

瘡瘍經驗全書目錄

第十三卷

總說

七則

或問

二十一則

治驗

二十九則

方法

四十九條

宜忌

十七條



瘡瘍經驗全書卷之十三

宋燕山竇漢卿輯著

天都洪瞻巖

桐川陳友恭

全校

黴瘡秘錄總說

黴瘡一症古未言及究其根源始于午會之末起自
嶺南之至使蔓延通國流禍甚廣今當未會之
初人稟浸薄天厲時行交媾鬪精氣相傳染一感
其毒酷烈匪常入髓淪肌流經走絡或中於陰或
中於陽或伏於內或見於外或攻臟腑或巡孔竅
有始終只在一經者有越經而傳者有間經而傳



者有毒伏本經者形症多端而治法各異卽如

毒中腎經始生下疳繼而骨痛瘡標耳內陰囊頭頂

背脊形如爛柿名曰陽癰瘡甚則毒傷陰陽二竅

傳於心發大瘡上下左右相對掣痛連心移於肝

眉髮脫落眼昏多淚或癩爪甲毒伏本經作偏正

頭痛甚則目盲耳閉或生嗣不壽久則毒發囊穿

毒中肝經先發便毒嗣作筋疼瘡標耳項脇肋形如

砂仁俗以砂仁瘡名之甚則筋痿不起傳於脾四

肢發塊痛楚或蛀爛腿膝移於心生瘡如痣痛痒

交作毒伏本經大筋微疼久則毒發頸項兩膝一

毒中脾經瘡標髮際口吻或堆肛門形如鼓釘俗以
廣痘名之甚則毒伏臟內傳於腎骨痛髓烈發癰
百會委中湧泉等穴移於肺肌膚生癰如花色紅
紫褪過卽成白癰毒伏本經發斑如丹久則毒結
腸胃

毒中肺經瘡標腋下胸膛面頰形如花朵俗以棉花
瘡名之甚則毒聚咽喉傳於肝作筋疼遇月郭
或天陰申酉時分作疼移於腎作腎臟風痛痒交
作毒伏本經生赤白癰久則毒結膺臆臂膊

毒中心經瘡標肩臂兩手紫黑酷似楊梅俗以楊梅

瘡名之甚則毒攻眸子傳於肺發喉癰漸蝕鼻梁
多作痰唾移於脾生鶩掌風癰手足起止不隨毒
伏本經十指流痛久則毒攻舌本或結毒小腸
是症也不獨交媾相傳稟薄之人或入市登園或與
患者接談偶中毒氣不拘老幼或卽病或不卽病
而慘痛週身或不作痛而傳於內室或內室無恙
而移患於子女甥孫者故備述受病根源施治本
本方法啓前人未發之秘病有經絡毒有淺深藥
有緩急察脉審症應攻應補毫不可紊毒未傳變
一臟見症者半月愈三臟見症者一月愈五臟俱

受病者五十日全愈此皆獨得之法已經印證海
內名公妙在易生易褪疤不紫黑身無痛苦交構
不染生嗣無恙不伐胃氣元神誠千古不易之
之聖藥也設或妄施汗下點擦薰洗等藥徒速
時効驗殊不知毒伏於內戕賊臟腑釀成已上諸
症以致投藥罔効余能刻日收功又能拔去輕粉
之毒使終身無患非若粗工之不經者此症直可
自任故爲是說以公之

黴瘡或問

或問曰黴瘡爲患何自而昉乎余曰嶺南之地卑濕

而暖霜雪不加蛇蟲不蟄諸凡汙穢蓄積於地遇
一陽來復濕毒與瘴氣相蒸物感之則黴爛易敗
人感之則瘡瘍易侵更逢客火交煎重虛之人卽
冒此疾故始謂之陽黴瘡云以致蔓延傳染斯以
娼家有黥過之說皆由氣運所使因漸而致也
或問黴瘡爲氣運所使有云廣瘡何也余曰廣瘡者
與痘相類痘瘡古所無有始生於北其氣自北而
南漢時謂之胡痘由先天之所中無論男女貴賤
遇歲火流行鼓腋而發若黴瘡者古亦無有始起
於南其氣自南而北今時謂之廣瘡由後天之所

感不問老幼愚智元稟虛怯者觸穢而染胡痘以地命名孰非氣運之所使乎

或問此症有謂楊梅瘡有謂棉花瘡有謂砂瘡有謂不一者何也余曰毒之相感者一氣也臟之見

症者各異也如痘瘡有紅斑白癰如荳如蔴如蠶子如土蛭如茱萸如葡萄或移毒眼目肘膝形症多端大約似荳者多半故名曰痘瘡如黧瘡有赤遊紫癰如瘋如疹如砂仁如棉花如鼓釘如爛柿如楊梅或結毒破爛孔竅名狀不一大約似楊梅者多半故名曰梅瘡痘瘡梅瘡皆以形命名所以



不一也

或問其瘡傳染不已何也余曰昔人染此症親戚不

同居飲食不同器置身靜室以俟愈故傳染者少

邇來世薄人妄沉匿花柳者衆忽於避忌一犯有

毒之妓淫火交熾真元弱者毒氣乘虛而襲初不

知覺或傳於妻妾或傳於姣童上世鮮有醫書可

正故有傳染不已之患

或問老幼之人不近妓女突染此瘡竟有結毒者何也余曰不獨交媾鬪精或中患者毒氣薰蒸而成

或祖父遺毒相傳此又非形接之比也

或問有人與患者同寢共食不傳染者何也余曰此
由先天之氣充固邪氣無間而入所以有終身不
妓半世作風流客者竟無此恙

或問交媾偶中毒氣有輕重否余曰毒隨神轉走絡
流經壯者氣行則已怯者則着而爲患

或問諸痛痒瘡瘍皆屬心火何心經獨擬於後耶余
曰此毒上起脾肺下起腎肝心乃陽主陰邪不能
先犯諸經傳變而心始受邪故初生瘡子不爲痛
楚或元陽虛怯直中少陰者發作遂痛

或問毒傳臟腑切脉可知否余曰脉者氣血之道路



氣清脉和氣濁脉滯若有毒者其脉必沉如毒聚
肝經者左關脉必沉澁寅卯時診之或遲或結不
復流同者其毒深重餘臟倣此非若他毒以洪大
滑數爲準反是者症必難治

或問有患者服藥而愈精神未復者何也余曰毒未
盡化藥不勝病耳蓋毒不盡則精神不復非骨節
酸痛則疤色紫黑故交媾便有所染生嗣未免有
毒倘或性氣躁率屢犯禁忌者遂使一分之毒未
除竟能復十分之患不知者反責前藥無効此非

倦藥者自廢歟



或問醫治此患或用湯藥者或用散藥者或用丸藥者皆能獲効有等患者深慮輕粉爲害畏服丸散單用煎劑能收全功否余曰審察病機者醫之智也攻邪伐病者藥之能也夫毒有多少形有盛衰治有緩急方有大小臟有高下腑有遠近症有表裏藥有輕重草木之性多爲湯液金石之品俱作丸散故方有七大小緩急奇偶復劑有十宣通補瀉輕重滑澁燥濕方不七不足以盡方之變劑不十不足以盡劑之用凡治病在陰者毋犯其陽病在陽者毋犯其陰犯之者是謂誅伐無過病在於

經則治其經病在於絡則治其絡病從氣分則治其氣病從血分則治其血病在於表毋攻其裏病在於裏毋虛其表邪之所在攻必從之受邪爲本見症爲標五虛爲本五邪爲標病屬於實宜治以急實者邪氣勝也邪不速逐則爲害蔓延故治實無遲法病屬於虛宜治以緩虛者精氣奪也治宜次第故治虛無速法亦無巧法虛則補之實則瀉之有是症而用是藥此萬世之常度也如傷寒禁用水藥恐庸俗悞用芫荳丸若用大黃丸則宜矣且業有專門工有高下又非槩論也

或問此症有用一二方面愈有用百藥無効者何也
余曰一二方面効者多因稟厚毒淺或患者之
耐性訪醫擇藥調攝得宜所以正氣足而邪自除
也若百藥無効者乃中毒之深也又非毒之中深
由受毒之始速求病痊不究標本亂投湯劑以致
真元耗削藥毒蓄積於內遂有變症雜出往往至
於傷生患者醫者俱不覺察故未經藥餌者僅爲
終身不瘳之疾悞投藥石者定罹天橫之患由是
紅紫眩亂使病者暗受其弊也

或問治法有用擦手足心者有煎湯薰洗者有藥點

者有燈照者或効或不効而受累者何也余曰用
此四法取効一時與庸工用輕粉無異得其特者
効或有之失其時者其毒反熾而終身不瘳也
或問何爲得時何爲失候余曰毒盡達於肌表面治
之則爲得時毒未透發而妄攻者謂之失候

或問患者親自製藥或用食物發之仍有結毒者何
也余曰世人徒知庸俗暗投輕粉遏藥致有結毒
後患殊不知妄施蟲介草汁過服敗毒發毒寒涼
等藥其累不減於輕粉也

或問初生疳瘡便毒大瘡細子至筋骨疼痛喉癰蝕

鼻發塊上下破爛孔竅驚掌白癰其治同否余曰
感此毒者一氣也然毒之見症者不一也如傷寒
疹子從表而傳裏疫病痘瘡從內而達外惟此症
出入無常伏見不一論其本則一究其末自殊正
爲稟有厚薄病有新久工有上下藥有良毒豈可
局一定之方面欲愈不一之疾乎

或問已上見症據經服藥能指日收功否余曰此皆
獨授秘密得心應手譬諸行熟道者遠近可計步
而至也如初生下疳腫爛未作骨痛者服藥十三
日愈爛去陽物摻藥不効名蛀梗或爲卷心服藥

二十五日愈橫痃雙生者服藥十三日愈單生便
毒作筋疼者服藥十九日愈便毒潰破不斂名爲
魚口兼之疳瘡者服藥廿六日愈陽物生瘡如楊
梅堆滿狀如鼓椎他處不生者名爲獨腳楊梅瘡
服藥四十五日愈生瘡形如砂仁內作筋疼者服
藥廿五日愈形如爛柿內作骨痛者服藥三十一
日愈瘡標髮際口吻肛門他處未見者服藥二十
一日愈形如大荳多見四肢者服藥二十七日愈
胸膺面頰先標形如花朶者服藥二十五日愈上
下左右對壘形如楊梅者服藥三十三日愈筋骨